

Schnitzelbank 2007

vom Güggu

Motto: Mir chöme dure und halte alli d'Schnurre.

Sit de 0,5 Promill schteit d'Polizei a allne Egge.
Ou mi hei si gschopt und i ha gmerkt: Aha die wei mi lege!
Drum frage i fründlech: Wele vo euch vier wott mi Uswis gseh?
Da seit e Schtimm: Usstige, Mano! Blase! Mir si nume zwe!
Mir chöme äbe nume dure,
we mir alli halte d'Schnurre.

Schtümpe paffe, Sigarette rauche, isch bald überall verbote.
Die rauchendi Bevölkerung wott me jetzt usrotte!
I säge euch: das führt so wit, ou du chunsch einisch dra,
dass du zum Höpperle e Bewilligung muesch ha.

Die hei im Oberland PR gmacht,
wo ne der Eiger isch s'Loch abe kracht.
Fernseh, Helikopter und Prominenz
hei sie ufe charret im späte Lenz.
Hei alli äxtra Ferie gno,
doch d'Nordwand, die schteit immer no.

D'Medizin, die wott sech trenne.
Nach Fachgebiet, um Bischpiel z'nenne.
Nach Sankt Galle chömme die Blinde,
z'Basel tuesch Toubi finde,
z'Bern si die Chneu-verränkte,
u z'Züri blibe die süsch Beschränkte.

D'Fuessball-WM im Dütsche isch prächtig gsi.
Ou d'Schwizerbuebe vom Köbeli si schints gsi derbi.
Für d'EM i dr Schwiz, so ghört mer's munkte,
wott der Zloczower bi Penaltis d'Stadion verdunkle.

Mh mh mh mh,
Mh mh mh mh,
Mir Swissair Schefe, liebi Lüt,
Si völlig suber und säge nüt.
I gloube das nid und i wett's drum bestritte,
für mi si das neu Symptom vo der Vogelgrippe.
Oder: Mir chöme dure und halte alli d'Schnurre!

Der Reto und der Stephan wüsse beid,
was alls isch z'Bern so abverheit.
Drum gseht me uf de Plakatei
ihri ging lächelnde Konterfei.
E Foto vom Fuchs, die müsst me de striche,
die würdi z'fescht ere Karrikatur vom Mohammed gliche.

D'Schribere, so han i 's gläse,
sig es bsunders emanziertes Wäse.
Im Erlacherhof wärd viel negiert
und nümme wie zu Zyte vo Elsbeth und Liselotte regiert.

Wer hett im Läbe scho dra dänkt,
dass mir in Bern ganz unbeschränkt
e neui Hütte für Gegenwartkunst chöi ha?
Dä Träumer lüt doch mal em Denkmalpfleger a!

Der Schtapi laht dr Stadtbach offe,
damit dä inegheit, wo halt isch bsoffe.
Reklamiersch? Pass uf, de geit er hin
und bout übere Bach e Baldachin!

Fasnacht isch's, mini liebe Lüt, i sueche jetzt der Rank,
z'beende mini Schnitzelbank.
U gloubet mir jetzt, i chume besser dure,
wenn ig es Jahr lang halte d'Schnurre.

S'git hie inne sicher mäenge Mürggü.
Ade sägen i euch allne, i bi der Güggu.

22.02.2007 Güggu